

Minister Rene Herdé ta cla pa traha!

DIARANSON 9 di juli 2025, den presencia di Prome Minister mr. Mike Eman y Minister mr. Wendrick Cicilia y Secretaria di Consejo di Minister mr. Indra Hassell-Duarte, a tuma luga e huramentacion di drs. Gervais Rene Herdé door di Su Excelencia Gobernador Alfonso Boekhoudt.

Despues cu Parlamento a aproba e credencialnan di drs. Herdé, un rato despues na Cas Ceremonial, sr. Herdé a hura-menta como e siguiente Minister di Infraestructura, Energia y Telecomunicacion y ta bira e di shete minister di Gabinete AVP-Futuro.

Prome Minister Eman a sigura cu e encargo ta den man di un persona cu hopi capacidad, dedicacion y devocion, cu un carera largo den politica y cu a sirbi su pais dignamente. Sr. Gervais “Baba” Rene Herdé lo fungi como Minister di Energia mientrastanto cu e candidato ing. Mike de Meza, ta resolve e obstaculo pa e por ta ministeriabel. A pesar cu e proceso por tuma tempo, tin speransa cu ing. de Meza ainda por tuma e cargo como Minister di Energia.

Ken ta Gervais Rene Herdé?

Gervais Rene Herdé a nace na Aruba, den Companashi dia 16 di september 1951. Yiu di “Louisa Herdé- Amoroso y Felix Romain Herdé, negociante, schutter y manager di restaurant. Banda di hunga baseball Herdé a pasa su hubentud den e club hubenil di “De Trupialen”. E experiencianan di su hubentud den Companashi y “De Trupialen” a forma resto di su bida. Rene a caba Colegio Arubano (HBS-B) na año 1971, y despues a studia politica, maneho y planificacion di enseñansa na Universidad di Leiden, Hulanda. Despues di su estudio sr. Herdé a bolbe Aruba y a cuminsa traha pa gobi-erno insular di Aruba na 1980 y a fungi como miembro di sindicato SIMAR pa hopi año. Ademas sr. Herdé a forma parti den varios comision pa prepara Status Aparte. Despues di 1986 ora Aruba a haya su autonomia, sr. Herdé a traha den gruponan di trabou riba e prome plannan pa renobacion di enseñansa, pa e renobacion di formacion di maestro di scol y na e prome plannan pa maneho di idioma y introduccion di Papiamento den enseñansa na Aruba.

Entre 1987 y 1989 Rene Herde’ a traha como hefe di Bureau Organisatie & Efficiëntie encarga cu organisacion di e aparato di gobierno. Entre 1989 y 1992 Herdé a traha na Universidad di Aruba entre otro den creacion di e Facultad Financiero Economico (FEF) y despues a traha den sector priva como director di personal y formacion na ARUBA SEAPORT RESORT entre 1992 y 1994.

Na 1990 Rene Herdé a bira miembro di e partido AVP. E



tabata miembro di Consejo di Partido durante di tur elec-cion sin ta riba lista. Den e periodo aki el a traha cu minister y politiconan di AVP manera Henny Eman, Watty Vos, Manchi Engelbrecht, Mito Croes, Eddy Croes, Digna Laclé-Herera, Mary Wever-Laclé, Glenda Margaretha, Duke Croes, Roly Bislick, Tico Croes, Ike Posner, Benny Sevinger, Mike de Meza y tur minister y parlamentario den añanan 90 te awe 2025. Na 2005 sr. Herdé a subi lista di AVP pa prome biaha y na 2009 a drenta Parlamento di Aruba y a bira Lider di Fraccion. Den Parlamento a fungi den diferente comision y e ta presidi e comisionnan di ‘Finansa & Economia’ y di ‘Asunto di Reino y Asunto di Exterior’. Na 2017 a clausura su carera profesional y politico, pero a keda activo den partido AVP. Na 2025, Partido AVP a acerca sr. Herdé pa bira e Minister Plenopotenciario di Aruba na Den Haag den Gabinete AVP-FUTURO.

Rene Herdé tin dos ruman mas grandi, Emile Herdé y Bianca Tobin. E ta casa cu Lucy Peterson y tin tres yiu, Paolo, Dinotra y Eva Maria. E tin tres nieto, Zoë, Dex y Ivy.

Prome Minister Eman a gradici colega Minister di Husticia mr. drs. Arthur Dowers cu a tuma encargo temporal di e ministerio di Energia y Infraestructura, y a percura pa cosnan cana stret.

Minister Herdé a duna di conoce cu e ta cla pa traha. “*Traha cu un plan y cu hendenan cu tin experiencia*”. Segun Minister Herdé, e no ta un ofensa pa ta un pensionado, haciendo referencia na e critica riba media social. Minister Herdé sigur no tin miedo pa traha cu e generacion hoben, ta habri pa ideanan nobo y ta conta cu sosten grandi tanto den partido como den parlamento.